



KEMENTERIAN PENDIDIKAN MALAYSIA

KURIKULUM STANDARD SEKOLAH RENDAH

Bahasa Kadazandusun

Dokumen Standard Kurikulum dan Pentaksiran

Tahun 6



KEMENTERIAN PENDIDIKAN MALAYSIA

KURIKULUM STANDARD SEKOLAH RENDAH

Bahasa Kadazandusun

Dokumen Standard Kurikulum dan Pentaksiran

Tahun 6

Bahagian Pembangunan Kurikulum

SEPTEMBER 2021

Terbitan 2021

© Kementerian Pendidikan Malaysia

Hak Cipta Terpelihara. Tidak dibenarkan mengeluarkan mana-mana bahagian artikel, ilustrasi dan isi kandungan buku ini dalam apa jua bentuk dan dengan cara apa jua sama ada secara elektronik, fotokopi, mekanik, rakaman atau cara lain sebelum mendapat kebenaran bertulis daripada Pengarah, Bahagian Pembangunan Kurikulum, Kementerian Pendidikan Malaysia, Aras 4, 6-8, Blok E9, Parcel E, Kompleks Pentadbiran Kerajaan Persekutuan, 62604 Putrajaya

KANDUNGAN

Rukun Negara	v
Falsafah Pendidikan Kebangsaan	vii
Definisi Kurikulum Kebangsaan	ix
Kata Pengantar	xi
Kopointutunan	1
Hizab	2
Dimpoton	2
Dingkai Kurikulum Standard Sikul Pintangaan	4
Hontolon	5
Kabaalan Abad Ko-21	5
Kabaalan Momusorou Taang Takawas	7
Strategi Pongia'an om Pambalajalan	9
Elemen Morentas Kurikulum	11
Pontaksiran Bilik Darjah	15
Ponguludan Ponuangan	18
Kabaalan Mokinongou om Moberos	26
Kabaalan Mambasa'	32
Kabaalan Monuat	35
Aspek Kolumison Boros	39
Aspek Puralan Boros	42

Nuludan Boros	46
Panel Minomonsoi	48
Koponongkotohuadanan	49



RUKUN NEGARA

BAHAWASANYA Negara kita Malaysia mendukung cita-cita hendak:
Mencapai perpaduan yang lebih erat dalam kalangan seluruh masyarakatnya;
Memelihara satu cara hidup demokratik;
Mencipta satu masyarakat yang adil di mana kemakmuran negara
akan dapat dinikmati bersama secara adil dan saksama;
Menjamin satu cara yang liberal terhadap tradisi-tradisi
kebudayaannya yang kaya dan berbagai corak;
Membina satu masyarakat progresif yang akan menggunakan
sains dan teknologi moden;

MAKA KAMI, rakyat Malaysia, berikrar akan menumpukan seluruh tenaga dan usaha kami untuk mencapai cita-cita tersebut berdasarkan atas prinsip-prinsip yang berikut:

**KEPERCAYAAN KEPADA TUHAN
KESETIAAN KEPADA RAJA DAN NEGARA
KELUHURAN PERLEMBAGAAN
KEDAULATAN UNDANG-UNDANG
KESOPANAN DAN KESUSILAAN**



KOTUNUDAN POGUN

Pogun tokou Malaysia nopo nga' kipongia'an do hizab do:
Sumigampot montok piisaan di topiot id taatanga' do tulun ginumuan;
Manampasi do iso' ralan pogiigion di demokratik;
Moniudong do iso' tinimungan tulun mogiigion di aadang id nombo do kasanangan Pogun
aanu mogibaabagi miampai do aadang o kalaalahano';
Manahak kopontontuan kalansanan miampai poingukab ginawo doid kopogisuusuaian
om mogikaakawo koubasanan sandad;
Moniudong do iso' tinimungan tulun mogiigion di muu'-buu' i momoguno do
sains om teknologi doun kawawagu.

MANTAD NODII DILO', YAHAI, tulun do Malaysia, dumandi' do monolinoos do sawiawi' o lokis om
pinggisamaan do sumigampot do hizab diti tumanud do Prinsip id siriba':

**KOTUMBAYAAN ID KINOINGAN
TUMUMBOYO' DOID LAJA' OM POGUN
KOMIYO'ON DOID KUASA' DO KOOTURAN POGUN
KOIMOYO'ON DO KUASA' UNDANG UNDANG
KAPAMANTANGAN OM KINITUNGAN**

FALSAFAH PENDIDIKAN KEBANGSAAN

“Pendidikan di Malaysia adalah suatu usaha berterusan ke arah lebih memperkembangkan potensi individu secara menyeluruh dan bersepadu untuk melahirkan insan yang seimbang dan harmonis dari segi intelek, rohani, emosi dan jasmani, berdasarkan kepercayaan dan kepatuhan kepada Tuhan. Usaha ini adalah bertujuan untuk melahirkan warganegara Malaysia yang berilmu pengetahuan, berketerampilan, berakhlak mulia, bertanggungjawab dan berkeupayaan mencapai kesejahteraan diri serta memberikan sumbangan terhadap keharmonian dan kemakmuran keluarga, masyarakat dan negara”

Sumber: Akta Pendidikan 1996 (Akta 550)

FALSAFAH PAMBALAJALAN POGUN

“Pambalajalan id Pogun Malaysia nopo nga' iso' pinggisaman di potilombus montok popoburu' sawi-awi' potensi do tosoosongulun om nogi' montok momolodi' do songulun di osulimbang om osinonod id intelekt, korusadan, ginua' ginawo om kotinano', poinsondot nogi' o kotumbayaaan om kotunjukan kumaa Minamangun. Pinggisaman diti kituduan do momolodi' tinaru Malaysia di kitoilaan, kilompu', kiwoyo' tolinuud, kitonggungan om koimau do momodimpot kohingkangan koposion om kaanu manakadai id kotoonongon om kopuawangan do paganakan sondii', tinaru om pogun.”

Tadon: Akta Pendidikan 1996 (Akta 550)

DEFINISI KURIKULUM KEBANGSAAN

3. Kurikulum Kebangsaan

(1) Kurikulum Kebangsaan ialah suatu program pendidikan yang termasuk kurikulum dan kegiatan kokurikulum yang merangkumi semua pengetahuan, kemahiran, norma, nilai, unsur kebudayaan dan kepercayaan untuk membantu perkembangan seseorang murid dengan sepenuhnya dari segi jasmani, rohani, mental dan emosi serta untuk menanam dan mempertingkatkan nilai moral yang diingini dan untuk menyampaikan pengetahuan.

Sumber: Peraturan-Peraturan Pendidikan (Kurikulum Kebangsaan) 1997

[PU(A)531/97.]

KOINTALANGAN KURIKULUM KEBANGSAAN

3. Kurikulum Kebangsaan

(1) Kurikulum Kebangsaan nopo nga' iso' program pambalajalan id nonggo poinhanggum no ngaawi' o abaabayan kurikulum om ko-kurikulum i papaamung do saawi-awi' toilaan, kabaalan, norma, woyo', tungkus koubasaan om kotumbayaan montok monguhup id koburuon di poimponu' do tosoosongulun tanak id aspek koinano', korusadan, pomusarahan om ginua' ginawo om nogi' montok mananom om popoingkawas kowoowoyo' moral i oponsol montok popolombus toilaan.

Tadon : Peraturan-Peraturan Pendidikan (Kurikulum Kebangsaan) 1997

[PU(A)531/97.]

PENGANTAR

Kurikulum Standard Sekolah Rendah (KSSR) yang dilaksanakan secara berperingkat mulai tahun 2011 telah disemak semula bagi memenuhi dasar baharu di bawah Pelan Pembangunan Pendidikan Malaysia (PPPM) 2013-2025 supaya kualiti kurikulum yang dilaksanakan di sekolah rendah setanding dengan standard antarabangsa. Kurikulum berasaskan standard yang menjadi amalan antarabangsa telah dijemakan dalam KSSR menerusi penggubalan Dokumen Standard Kurikulum dan Pentaksiran (DSKP) untuk semua mata pelajaran yang mengandungi Standard Kandungan, Standard Pembelajaran dan Standard Prestasi.

Usaha memasukkan standard pentaksiran di dalam dokumen kurikulum telah mengubah lanskap sejarah sejak Kurikulum Kebangsaan dilaksanakan di bawah Sistem Pendidikan Kebangsaan. Menerusinya murid dapat ditaksir secara berterusan untuk mengenal pasti tahap penguasaannya dalam sesuatu mata pelajaran, serta membolehkan guru membuat tindakan susulan bagi mempertingkatkan pencapaian murid.

DSKP yang dihasilkan juga telah menyepadukan enam tunjang Kerangka KSSR, mengintegrasikan pengetahuan, kemahiran dan

dan nilai, serta memasukkan secara eksplisit Kemahiran Abad Ke-21 dan Kemahiran Berfikir Aras Tinggi (KBAT).

Penyepaduan tersebut dilakukan untuk melahirkan insan seimbang dan harmonis dari segi intelek, rohani, emosi dan jasmani sebagaimana tuntutan Falsafah Pendidikan Kebangsaan.

Bagi menjayakan pelaksanaan KSSR, pengajaran dan pembelajaran guru perlu memberi penekanan kepada KBAT dengan memberi fokus kepada pendekatan Pembelajaran Berasaskan Inkuiri dan Pembelajaran Berasaskan Projek, supaya murid dapat menguasai kemahiran yang diperlukan dalam abad ke-21.

Kementerian Pendidikan Malaysia merakamkan setinggi-tinggi penghargaan dan ucapan terima kasih kepada semua pihak yang terlibat dalam penggubalan KSSR. Semoga pelaksanaan KSSR akan mencapai hasrat dan matlamat Sistem Pendidikan Kebangsaan.

Haji Azman Bin Haji Adnan
Pengarah
Bahagian Pembangunan Kurikulum
Kementerian Pendidikan Malaysia

KOPOINTUTUNAN

Poia'on o mato palajalan Boros Kadazandusun diti id Kurikulum Standard Sikul Tosiriba' sabaagi' mato palajalan *tambahan* kumaa tangaanak mantad tinaru Kadazan, Dusun om nogi' tangaanak mantad tinaru' suai i aanangan mingsingilo do boros diti.

Noulud o Kurikulum Standard Boros Kadazandusun Sikul Tosiriba' diti maya' teori ponginabasan boros koduo. Noulud nogi' o kurikulum diti tumanud ponginsamakan woyo' mod \underline{u} lar i manahak do panatalan kumaa kabaalan boros, kopongorotian do sistem boros om kotilomb \underline{u} san do tungkus koubasanan om toilaan sand \underline{a} d do tinaru Kadazan om Dusun.

Suai ko mantad dilo', haro nogi mogikaakawo prinsip, strategi om taksonomi kopongia'an om pamb \underline{a} lalajalan boros di notimb \underline{a} ng om naanu id ponguludan do kurikulum diti.

Nowonsoi o kurikulum diti montok popoburu toilaan om kabaalan do tangaanak kokomoi do boros om tungkus koubasanan tinaru Kadazan om Dusun. Kopihuyud iti do *Aspirasi Murid id Pelan Pembangunan Pendidikan Malaysia (PPPM) 2013-2025*: manahak kosiwatan kumaa tangaanak do mingsingilo do boros mantad tinaru suai.

Noulud nogi' o kurikulum diti montok popoting \underline{d} ohoi do woyo' tolinuud om koulaalaho' di tosonong id tangaanak mooi do kaanu nodii yolo' momogompi om popotilomb \underline{u} s do tungkus koubasanan om toilaan sand \underline{a} d tinaru Kadazan om Dusun.

Poinsong \underline{d} ju nogi' id ponguludan do Kurikulum diti o hizab do Rukun Negara, Dasar Pendidikan Kebangsaan om Falsafah Pendidikan Negara. Mantad no dilo' do noulud iso' kurikulum di kopongunsub do piunungan om kotonongon toinsanan tinaru id pogun Malaysia suai ko' kaanu popoingkawas do koburuon koinanon, topurimanan, korusadan, om intelek.

HIZAB

Winonsoi o Kurikulum Standard Boros Kadazandusun Sikul Tosiriba' diti montok manahak kosiwatan kumaa tangaanak do tinaru Kadazan, Dusun om tangaanak mantad tinaru suai i aanangan misingilo do boros diti do mongintutun om popotilombus pomogunaan boros Kadazandusun. Suai ko dilo' hizabon nogi' do kurikulum diti do popogiroto toilaan kokomoi tungkus koubasanan tinaru Kadazan om Dusun mooi do au' nodii atagak om ogompi toririmo.

DIMPOTON

Poluda'on o kopongia'an Boros Kadazandusun id sikul tosiriba' montok momolodi' tangaanak di koilo momoguno do Boros Kadazandusun di olinuud om oulud id pilumaagan om koposion tikid tadau. Suai ko' mantad dilo' oluda' nogi' daa o tangaanak i kaanu mongintutun om popotilombus do tungkus koubasanan om mongilo miampai monginonong do toilaan sandad do tinaru Kadazan om Dusun.

Id kolimpupuson sikul tosiriba', kaanu o tangaanak


1. Mampayat id pilumaagan lisan montok maganu, mangarati', manahang om poposunud kawagu do koilaan.
2. Mambasa' om popolombus mogikaakawo ayat om teks miampai momoguno do loyuk kopolombusan di kotunud.
3. Momoguno mogikaakawo kabaalan mambasa' montok maganu, mangarati', manahang om poposunud kawagu do koilaan di nabasa'.
4. Momoguno mogikaakawo kabaalan monuat montok momonsoi ponuatan di kotunud, oulud, olinuud om odoropi id teks di mogisuusuai genre om kawo.
5. Momoguno Boros Kadazandusun di kotunud, oulud om olinuud id mogisuusuai kohuboyoon.
6. Popokito demonstrasi kokomoi tungkus koubasanan tinaru Kadazan om Dusun.
7. Mongintutun toilaan sandad tinaru Kadazan om Dusun.
8. Papapanggor woyo' tolinuud om woyo' oupus do tungkus koubasanan.

Id kolimpupuson do Toun 6, kaanu o tangaanak

1. Monoinu' om popolombus tuni mogikaakawo pimato.
2. Mamarait mogikaakawo boros.
3. Momoguno koilaan di norongou montok mogikaakawo kohuboyoon.
4. Popolombus pomusarahan toi ko' sogu' id pibarasan toi ko' id pitimbungakan.
5. Mambasa' om popolombus mogikaakawo ayat.
6. Momoguno mogikaakawo kabaalan mambasa' montok mogihum om mongompuri koilaan id teks.
7. Manahak tisuli' kumaa koilaan di nabasa' mantad mogikaakawo tadon.
8. Momoguno ija'an di kotunud id ponuatan.
9. Monuat mogikaakawo ayat om ponuatan kiformat miagal do susuyan, surat au formal, panahangan, om ponuhuan.
10. Monginonong koilaan kokomoi tungkus koubasanan tinaru Kadazan om Dusun.

DINGKAI KURIKULUM STANDARD SIKUL TOSIRIBA'

Nowonsoi o dingkai do KSSR diti maya' kopiongkungan do onom torigi montok momolodi' sosongulun di osulimbang id aspek koinano', ginua' ginawo, korusadan om intelek di okreatif, okritis om inovatif. Poinsungkad o onom torigi diti id gana' toilaan, kabaalan om woyo' di impohonon montok popotounda' do modal insan. Torigi nopo di nokomoi nga' Komunikasi, Koburuon koinano' om Estetika, Kotulunan, Koimatuan, Sains & Teknologi om nogi' Korusadan, Koulalaho' om Woyo'. Naandang om notimbang o suang do torigi ngaawi' diti id pamansayan do Kurikulum Boros Kadazandusun. Okito miagal id Rajah 1 o kotolinahasan om kopisougkahan do koonom-onom torigi diti.



Rajah 1: Dingkai Kurikulum Standard Sikul Tosiriba'

HONTOLON

Montok momodimpot do hizab om dimpoton do mato palajalan diti, noulud o Kurikulum Boros Kadazandusun di poposontol do aktiviti kopongia'an om pambalajalan di kaanu popoingkawas do kabaalan boros miagal ko' kabaalan mokinongou, maboros, mambasa' om monuat. Suai ko' mantad dilo' ponginabasan do toilaan sistom boros Kadazandusun om kabaalan monoriuk om mongilo tungkus koubasanan om toilaan sandad do tinaru nga' onuan nogi' do panatalan di poimponu'. Sawi-awi' kabaalan om toilaan diti poia'on maya' pongia'an om pambalajalan abad ko-21.

KABAALAN ABAD KO-21

Poia'on o mato palajalan Boros Kadazandusun maya' pongia'an om pambalajalan abad ko-21. Pongia'an om pambalajalan maya' do pomogunaan Kabaalan Abad Ko-21 nopo diti nga' kituduan do momolodi' do tangaanak di kiprofil miagal id pointayad id Jojual 1.

Jojual 1: Kointalangan kokomoi Kabaalan Abad Ko-21

PROFIL TANGAANAK	KOINTALANGAN
Kikataan	Kikotumbayaan id sondii' om abaal do monoguang om monolibamban do kobolingkaangan miampai kopurimon woyo' toleransi om empati.
Kikabaalan Takawas id komunikasi	Kikotumbayaan id sondii', okreatif om kikabaalan takawas id komunikasi lisan om ponuatan montok popoboros om popolombus do pomusarahan, topurimanan, sogu' om toilaan miampai momoguno mogikaakawo media om teknologi.

PROFIL TANGAANAK	KOINTALANGAN
Momuumusorou	Kipomusarahan di okritis, okreatif om inovatif, kaanu monoguang nunu-nunu nopo kobolingkaangan om kaanu maganu kootusan di kietika. Momusorou kokomoi do ponginabasan om kopurimon do fungsi diolo' sabaagi songulun mongiinginobos. Toririmo poposogu' ponguhatan om poingukab o ginawo kumaa perspektif, woyo' om koubasanan do tulun suai om nogi' kumaa isoiso' tinimungan. Kikotumbayaan id songdii' om okreatif id gana' ponginabasan wagu.
Momonsoi buruon id tinimungan	Agaan ginawo monguhup do wokon momongo isoiso' buruon, kopurimon do tonggungan momogo do buruanon dii miampai tambalut suai id tinimungan. Mamantang om monongkotoluad do ponguhupan do wokon. Kabaalan interposonol di aanu maya' aktiviti kolaboratif, kaanu mamadadi diolo' songulun di milo lansanon om songulun puru di tosonong do tinimungan diolo'.

PROFIL TANGAANAK	KOINTALANGAN
Aanangan Minsingilo	Aanangan minsingilo montok mogihum strategi om idea wagu. Minsingilo yolo' do kabaalan wagu montok papapanau do aktiviti inkuiri om ponoriukan. Popokito nogi' yolo' do woyo' minsoosondii' id pambalajalan. Kikahantalan yolo' do pambalajalan potilombus id koposion.
Kiprinsip	Poingigit toririmo yolo' do prinsip songulun di apatong, otulid ginawo, aadang om mamantang kopio do tulun suai toi ko' isoiso' tinimungan. Kopurimon yolo' toririmo do tonggungan diolo' kokomoi nunu nopo koimaan om kootuson di naanu diolo'.
Kitoilaan	Aparagat yolo' maganu om mangarati' mogikaakawo toilaan mantad mogikaakawo gana' toilaan. Kikagarasan nogi' yolo' mogihum koilaan di opinto id konteks do suang om labus pogun. Kopurimon toririmo do isu-isu kokomoi etika om kooturan kokomoi do koilaan di naramit.

PROFIL TANGAANAK	KOINTALANGAN
Obingupus	Toririmo yolo' popokito woyo' songulun di kiwoyo' empati, obinsianan om mamantang do pokionuon om topurimanan do wokon. Ouli' yolo' id kotompunan kumaa do wokon om toririmo momogompi posorili' diolo' mooi do atampasi sogiigisom.
Patriotik	Toririmo popokito upus, sokodung om pamantangan kumaa pogun sondji'.

KABAALAN MOMUSOROU TAANG TAKAWAS

Kabaalan Momusorou Taang Takawas (KMTT) nopo nga' iso' kogisaman montok momoguno toilaan, kabaalan om woyo' toluud id proses momogono' montok monolibamban kobolingkaangan, soira' maganu kootuson om kiwoyo' inovasi om kikogisaman montok momudali' isoiso' asil. Kabaalan nopo di poinhanggum id KMTT diti nga' miagal di okito id Jodual 2.

Jodual 2: Kointalangan kokomoi KMTT

TAANG POMUSARAHAN	KOINTALANGAN
Momoguno	Momoguno toilaan, kabaalan om woyo' toluud id mogisuai-suai koyuyuyuan montok monoina' isoiso' toina'on.
Kabaalan Mongompuri	Monompipi' do koilaan montok mangarati' kopio nunu komoyon do koilaan dii om nogi' montok monoinu' pisougkahan do iso' om tiso' koilaan.

KMTT	KOINTALANGAN
Kabaalan Manahang	Momiadang, maganu kootuson om kaanu manahak pounayan montok isoiso' ahal miampai momoguno kabaalan, toilaan, nawawayaan song _{ii} ' om woyo' toluud.
Kabaalan Monupu'	Momudali' pomusarahan toi ko' isoiso' asil di okreatif om kiwoyo' inovatif.

KMTT nopo nga' iso' kogisaman do momoguno toilaan, kabaalan om woyo' toluud id proses momogono' montok monolibamban kobolingkaangan, soira' maganu kootuson om kiwoyo' inovasi om kikogisaman montok momudali' isoiso' asil.

Kabaalan nopo di poinhanggum id KMTT diti nga': kabaalan momusorou di okritis, okreatif om kaanu momogono' om kaanu popokito do pomogunaan do strategi id proses momusorou.

Kabaalan Momusorou di okreatif nopo nga' kokomoi do kogisaman montok momudali' isoiso' asil di minomoguno do kabaalan imaginasi om koilaan sandad di poimpidan mantad do wokon.

Kabaalan Momogono' nopo nga' kogisaman do tosoosongulun monimbang om manahang isoiso' ahal.

Strategi Momusorou nopo nga' kokomoi do koulalaho' tongosoosongulun do mongulud ralan momusorou di kifokus montok monolibamban do isoiso' kobolingkaangan.

Kawasa' do gunoon o KMTT id aktiviti pongia'an om pambalajalan id kalas. Asawangan o KMTT diti maya' aktiviti pambalajalan di kiwoyo' momogono' miagal ko pambalajalan inkuiri, ponolibambanan do kobolingkaangan om nogi' maya' kalaja' projek. Mositi no do momoguno o mongingia' om tangaanak ngaawi' do kakamot pomusarahan miagal do peta pomusarahan om pongudio di kitaang takawas mooi do kounsub tangaanak do momusorou.

STRATEGI PONGIA'AN OM PAMBALAJALAN

Winonsoi o Kurikulum Standard Sikul Tosiriba' toi ko' Kurikulum Standard Sekolah Rendah (KSSR) Boros Kadazandusun diti montok manahak kosiwatan kumaa tangaanak id sikul tosiriba' do mingsingilo do boros Kadazandusun maya' kopongia'an om pambalajalan di kohiok, kirati' om oulud. Pinosongju do konsep monginobos koilaan touhai o pongia'an do KSSR Boros Kadazandusun. Ponginabasan do Boros Kadazandusun id KSSR nopo diti nga' poposontol do ponginabasan boros id kohuboyoon di kirati' miampai papaamung sawi-awi' toilaan, kabaalan om woyo' tolinuud do Boros Kadazandusun i kaanu manahak kosiwatan kumaa tangaanak mingsingilo maya' aktiviti pambalajalan abad ko-21.

Prinsip do Pedagogi Kurikulum Standard

Ponginsamakan do pongia'an om pambalajalan do Kurikulum Standard nopo diti nga' maya' prinsip ngawi di pinatayad:

Ponginabasan do Kabaalan Touhai

Oponsol kopio do pasandangdon mantad id kotimpuunon o ponginabasan do kabaalan touhai miagal ko' kabaalan mokinongou, maboros, mambasa', om monuat tu' kabaalan diti no o poimpahan

do karaaralano' pambalajalan do tangaanak. Kabaalan touhai i oinobos do tangaanak koponguhup do popoingkawas kabaalan boros montok momodimpot taang di takawas.

Balajal id Koyuuyun di Kohiok, Kirati' om Kidimpoton

Pambalajalan di poposontol konteks di kirati' miampai papaamung toinsanan kabaalan boros i kaanu manahak kosiwatan kumaa tangaanak mingsingilo maya' aktiviti di kohiok.

Poinlongkod do Tangaanak

Mogisuai-suai kabalantasan, koporokisan, ralan balajal, koinabasan om koburuon tangaanak id pambalajalan do Boros Kadazandusun. Oponsol do papanahon o pongia'an di momoguno mogikaakawo ponginsamakan, teknik om kakamot pongia'an di kagayat do ginawo tangaanak. Mooi do odimpot o potensi pambalajalan tangaanak. Ponginsamakan masteri kaanu manahak kasakadayan kumaa tangaanak do monginobos toinsanan standard pambalajalan Boros Kadazandusun di noulud.

Pomogunaan Teknologi Wagu

Montok maganu om papabaagi koilaan id abad ko-21 diti, oponsol o toilaan momoguno komputer tu' teknologi nopo diti nga' teknologi piromutan i gunoon do timpu baino. Pomogunaan kakamot media elektronik om kapamansayan pionitan id internet kaanu manahak kosiwatan di tosima' kumaa tangaanak do miromut om mogi'ilang

toilaan. Ogumu' koilaan di aanu mantad Teknologi Koilaan om Pionitan diti. Kiguno o pomusarahan di okritis soira' memproses do koilaan di naanu montok momili' koilaan di kosudong.

Pambalajalan Abad Ko-21

Po'ia'on o mato palajalan Boros Kadazandusun maya' pongia'an om pambalajalan abad ko-21. Odimpot o pongia'an om pambalajalan abad ko-21 maya' pomogunaan do teknologi, media om digital id aktiviti pongia'an om pambalajalan id kalas. Posontolon id aktiviti pambalajalan do tangaanak o pambalajalan maya' kolaborasi, ponoriukan om pomogunaan do data. Posontolon nogi' o pomogunaan do pomusarahan id taang takawas, kritikal om kreatif id ponolibambanan do isoiso' ahal. Mogiuhup-uhup om agaan ginawo do manahak toi ko' poposogu' do pomusarahan om ponguhatan nga' iso' woyo' do aktiviti pambalajalan abad ko' 21.

Pambalajalan Maya' Pamansayan Projek

Balajal maya' pamansayan projek nopo nga' iso' ponginsamakan pongia'an di manahak kosiwatan kumaa tangaanak do monorimo toilaan om kabaalan maya' ponoriukan, pongintangan om nogi' maya' respon di otonu' montok isoiso' ponguhatan, ahal toi ko' kobolingkaangan.

Pambalajalan Maya' Kopongudian

Pambalajalan maya' kopongudian nopo nga' iso' kawo pambalajalan di poposontol do kaampayatan sawi-awi' tangaanak do mogihum om monoriuk sosondii' do koilaan kokomoi do isoiso' ahal toi ko'

kinaantakan. Aktiviti pogihuman om ponoriukan nopo diti nga' sistomatik, okritis om analitis. Minggisom o tangaanak do mogihum om monoriuk do koilaan gisom no do kointutuk do sisimbar toi ko' kootusan, mantad no dii diti do kaanu nodii o tangaanak do manahak do rumusan sosondii' kokomoi do ponoriukan dilo' dii.

Kapasarabakan Ponginlaaban Kowoowoyoo'

Prinsip di pasandadon id Kurikulum Boros Kadazandusun nopo nga' papapanggor sahsiah di tosonong. Pasandadon nogi' toinsanan woyo' toluud id pambalajalan Boros Kadazandusun moo do oluda' songulun mamamasok di kiwoyo' toluud, kiimatu om otoronong.

ELEMEN MORENTAS KURIKULUM

Poinsuang nopo do Elemen Morentas Kurikulum (EMK) nga' iso' nuyudan kabaalan, toilaan toi ko' woyo' tolinuud di poruhangon id proses pongia'an om pambalajalan. Nopili' o elemen ngaawi' diti mantad mogikaakawo gana' toilaan. Pasangadon o elemen ngaawi' diti kumaa do tangaanak sikul montok momogonop do kabaalan, toilaan om woyo' tolinuud diolo'. Oponsol iti montok momolodi' iso' tinaru pakaakalaja' di kikabaalan om kitoilaan montok popoburu' do ekonomi pogun. Oguno nogi' o kabaalan, toilaan om woyo' tolinuud diti soira' kotoguang do kobolingkaangan id koposion tikid tadau om nogi' montok gunoon id koposion do timpu dumontol. Elemen-elemen nopo di nopili' nga' miagal id pointayad:

1. Boros

- Oponsol kopio o pomogunaan do boros di kotunud, oulud om olinuud id kopongia'an do sawi-awi' mato palajalan. Unsubon o mongingia' ngaawi' do toririmo momoguno do boros di kotunud, oulud om olinuud mooi do kopongunsub kumaa tangaanak do toririmo momoguno do boros di agramatis om olinuud id komunikasi diolo'.

- Suai ko' mantad dii, koponguhup nogi' iti do tangaanak do mongulud om popolombus idea di opinto maya' komunikasi di efektif.

2. Kotomposianan Kinoyonon Posorili'

- Mositi no do pasangadon id aktiviti pongia'an om pambalajalan do sawi-awi' mato palajalan o koilaan kokomoi manampasi om manamong do kinoyonon posorili' tokou.
- Oponsol do potonomon o toilaan om sunduan manampasi do kinoyonon posorili' mooi do kopurimon toririmo o tangaanak do oupus om manamong do kinoyonon posorili' diolo'.

3. Woyo' Tolinuud

- Posontolon id sawi-awi' mato palajalan o woyo' tolinuud mooi do kopurimon om kiwoyo' tolinuud toririmo o tangaanak.
- Poinhanggum nopo do woyo' tolinuud diti nga' kokomoi do aspek korusadan, kotulunan om sunduan mamaamasok.

4. Sains om Teknologi

- Koingkawas o literasi Sains om toilaan Teknologi do tangaanak maya' pomogunaan do bakaang sains om teknologi id proses pongia'an om pambalajalan.
- Suai ko' mantad dilo', kopongunsub nogi' o bakaang ngaawi' diti doid pambalajalan di efektif om efisien.
- Pisoungkahan do toilaan Sains om Teknologi id pongia'an om pambalajalan poposontol do 4 ahal:
 - i) Toilaan kokomoi Sains om Teknologi (fakta, prinsip, konsep di kokomoi do toilaan Sains om Teknologi);
 - ii) Kabaalan saintifik (kokomoi isoiso' proses momusorou om kabaalan manipulatif);
 - iii) Koulaalaho' di pomsaintifik (kotunud, kotulidan ginawo, koumoligan); om
 - iv) Pomogunaan bakaang teknologi id aktiviti pongia'an om pambalajalan.

5. Patriotisme

- Kasandad o sunduan patriotik maya' kampanyatan do tangaanak id aktiviti pambalajalan do sawi-awi' mato palajalan om nogi' maya' kampanyatan doid aktiviti kurikulum om aktiviti monompuan do mogigion posorili' diolo'.

- Sunduan patriotik diti kaanu momolodi' do tangaanak di oupus do pogun songii' om ousikou toririmo sabaagi songulun mamaamasok id pogun Malaysia.

6. Kreativiti om Inovasi

- Kreativiti nopo nga' kokomoi do kogisaman momoguno do imaginasi montok monimung, mongompuri om poposogu' do isoiso' idea toi ko' momudali' asil kawawagu di poimpidan mantad do wokon.
- Inovasi nopo nga' kokomoi do pomogunaan do pomusarahan di okreatif montok monimban, monginwasi' om momoguno do idea di nokosogu'.
- Kreativiti om inovasi nopo nga' duo kabaalan di sopitanud om oponsol montok momolodi' tinimungan pakaakalaja' di kaanu monompuan om monoina' do koposion id Abad ko-21 diti.
- Koduo-duo elemon kreativiti om inovasi diti pisoungkahan id PdP.

7. Pongindopuan

- Mositi nogi' do pasangadon o kabaalan di oguno id pongindopuan mooi do katanom nodii o koulaalaho' songulun mongingindapu' di nakalantoi id tangaanak ngaawi'.
- Li nodii do unsubstongon ngaawi' o mongingia' do poposisip woyo' tolinuud do songulun mongingindapu' id proses pongia'an om pambalajalan. Woyo' nopo ngaawi' dii nga' miagal ko' abagos, otulid ginawo, milo lansanon om kitongungan. Suai ko' mantad dilo' unsubstongon nogi' o mongingia' do toririmo popoburu' do pomusarahan di okreatif om inovatif id tangaanak mooi do kaanu nodii yolo' poposogu' idea di topinto.

8. Teknologi Koilaan om Pionitan

- Momoguno do bakaang teknologi koilaan om pionitan id proses pongia'an om pambalajalan kaanu papapanggor toilaan om kabaalan do tangaanak do momoguno teknologi timpu baino.
- Momoguno do toilaan kokomoi teknologi toilaan om pionitan diti nogi' kopongunsub do pomusarahan di okreatif do tangaanak, kaanu poposodia' proses pongia'an om pambalajalan di kagayat do kaanangan do tangaanak om kaanu nogi' popoingkawas do kualiti pambalajalan.

9. Kotomposian Global

- Kituduan o Elemen Kotomposian Global diti do momolodi' do tangaanak di koilo momusorou om kiwoyo' responsif kumaa kotomposian om kotilombusan do posorili' id koposion do tikid tadau miampai momoguno toilaan, kabaalan om woyo' tolinuud di naanu mantad elemen Kotomposianan Pomogunaan om Pomounan, Mamamasok Global om Pisompuruan.
- Kiguno o Elemen Kotomposian Global diti montok poposodia' do tangaanak do tumoguang do kobolinkaangan om isu di otoguang id posorili', pogun om global.
- Li nodii do unsubstongon o mongingia' ngaawi' do poposisip do elemen diti id aktiviti pongia'an om pambalajalan.

10. Literasi Kousinan

- Pasangadon o Elemen Literasi Kousinan id pambalajalan do tangaanak mooi do awangun o generasi do timpu dumontol di kikabaalan takawas maganu kootusan kokomoi pomogunaan om ponoina'an kousinan om generasi di kietika om kopiumon do tonggungan id ahal di kokomoi do ponoina'an kousinan.
- Posisipon o Elemen Literasi Kousinan diti id p&p maya' pomogunaan do tema, uhu toi ko' kabaalan mongintob di kokomoi do kousinan. Koilaan kokomoi ponoina'an kousinan id koposion totootopot do tangaanak oponsol do poia'on kumaa do tangaanak ngaawi' mooi do kaanu o tangaanak ngaawi' momoguno do toilaan om kabaalan monoina' kousinan do efektif om kirati'.

PONTAKSIRAN BILIK DARJAH

Pontaksiran bilik darjah (PBD) nopo nga' proses monimumung koilaan kokomoi do koburuon do tangaanak. Pontaksiran nopo diti nga' potounda'on om papanahon do mongingia'. Papanahon o proses pontaksiran diti do pointilombus mooi do kaanu o mongingia' papatantu' do taang koinabasan di totootopot do tangaanak.

Kawasa' do papanahon do tongomongingia' o PBD diti maya' pontaksiran formatif om sumatif. Koindalan o pontaksiran formatif miampai proses PdP, poinsuai mantad do pontaksiran sumatif tu' koindalan id koowian do isosiso' unit pambalajalan, timpu pambalajalan, semester toi ko' id koowian toun.

Montok popoindalan do PBD, oponsol do uludon, wonsoyon, toina'on om toinu'on do mongingia' o item pontaksiran di mipahud do Dokumen Standard om Pontaksiran. Taang koinabasan tangaanak di otimumung mantad proses pontaksiran dii, mositi no do toina'on, posuaton, poopion om poluputon do mongingia' di pinopoindalan do pontaksiran dii.

Mooi do kaanu o pontaksiran diti do monguhup id kopoingkawasan do kogisaman om koinabasan do tangaanak, mositi no do kaanu o

mongingia' popoindalan do pontaksiran di kiwoyo' miagal id pointayad:

- Momoguno mogikaakawo ralan pontaksiran miagal ko pongintangan, lisan om ponuatan.
- Momoguno mogikaakawo strategi pontaksiran i milo poindalanon do mongingia' om tangaanak.
- Monimbang mogikaakawo taang toilaan om kabaalan di nabalajalan.
- Kopongunsub do tangaanak do popokito mogikaakawo kogisaman pambalajalan.
- Montaksir taang koinabasan do tangaanak maya' Standard Pambalajalan om Standard Prestasi.
- Popoindalan aktiviti ponondulian om pomiatan.

Haro duo kawo taang koinabasan di nokosodia' id dokumon diti. Taang Koinabasan Poimbida' om Taang Koinabasan montok isoiso' kabaalan.

Taang Koinabasan Poimbida'

Noulud o Taang Koinabasan Poimbida' diti montok papatantu' taang koinabasan sosongulun tanak id koowian toun. Gunoon o taang koinabasan di pointayad id jodual 3 montok monipong koinabasan tangaanak id sawi-awi' kabaalan boros. Li nodii do oponsol do kaanu o mongingia' monipong taang koinabasan do tangaanak maya' ponginamatan professional di poinwoyo' kolektif om holistik.

Jodual 3: Kointalangan kokomoi Taang Koinabasan Poimbida' Mato Palajalan Boros Kadazandusun.

TAANG KOINABASAN POIMBIDA'	
TAANG KOINABASAN	KOINTALANGAN
1 Au' Kodonto	Kaanu popokito koinabasan boros Kadazandusun di au' poingonop. Kaanu momongo isoiso' buruon di touhai maya' ponguhupan om ponontudukan.
2 Songgisom	Kaanu popokito koinabasan boros Kadazandusun di songgisom. Kaanu momongo isoiso' buruon di touhai maya' ponguhupan om ponontudukan.

TAANG KOINABASAN POIMBIDA'	
TAANG KOINABASAN	KOINTALANGAN
3 Giigina'	Kaanu popokito koinabasan boros Kadazandusun di giigina'. Kikabaalan momoguno Boros Kadazandusun di ogiigina' miapai ponguhupan soira' momongo isoiso' buruon di apangkal.
4 Awasi'	Kaanu popokito koinabasan boros Kadazandusun di tawasi'. Kaanu popokito kogisaman momoguno Boros Kadazandusun di tawasi' miapai ponguhupan di okuri'. Kaanu momongo isoiso' buruon di lobi kompleks miapai ponguhupan.
5 Akawas	Kaanu popokito koinabasan boros Kadazandusun di takawas. Kaanu popokito kogisaman momoguno Boros Kadazandusun di oulud om olinuud miapai ponguhupan di minima. Kaanu momongo isoiso' buruon di lobi kompleks miapai ponguhupan di songgisom.

TAANG KOINABASAN POIMBIDA'	
TAANG KOINABASAN	KOINTALANGAN
6 Nokoinuntu	Kaanu popokito koinabasan boros Kadazandusun di nokoinuntu. Kaanu popokito kogisaman momoguno Boros Kadazandusun di oulud om olinuud om aiso ponguhupan. Kaanu momongo isoiso' buruon di apangkal om kompleks.

PONGULUDAN PONUANGAN

Poia'on o mata palajalan Boros Kadazandusun diti tumanud ponginsamakan modular. Ponginsamakan woyo' modular diti kaanu popisoungko toinsanan kabaalan boros di strategik montok tudu do popoingkawas kabaalan boros miagal di poinsuat id Standard Ponuangan om Pambalajalan. Sabaagi iso' poomitanan, soira' do mongia' do kabaalan kolumison boros, kopisoungko nogi' o kabaalan suai miagal ko' kabaalan mokinongou, moboros, mambasa' om monuat id pongia'an dii. Manahak nogi' do panatalan kumaa pongia'an om pambalajalan kabaalan boros o ponginsamakan woyo' modular diti. Aktiviti pongia'an om pambalajalan nopo nga' mositi no do poinsuang id jodual puun.

Ponginsamakan Kurikulum

Minaganu ponginsamakan woyo' modular o mato palajalan KSSR Boros Kadazandusun diti. Suai ko' mantad dilo', noulud nogi' o Kurikulum Boros Kadazandusun diti momoguno do reka bontuk di pionsoungju do standard. Maya' poginsamakan modular, nabaagi o Kurikulum Boros Kadazandusun doid limo modul, Poinjuang nopo do toisoiso' modul dilo' nga' Standard Ponuangan, Standard Pambalajalan om Standard Prestasi tangaanak.

Kabaalan

	1	2	3	4	5
Uhu 1	Mokinongou & Moberos	Mambasa'	Monuat	Kolumison Boros	Puralan Boros
Uhu 2					
Uhu 3					
Uhu 4					
Uhu 5					
Uhu 6					
Uhu 7					
Uhu 8					
Uhu 9					
Uhu 10					

pp

Rajah 2: Kointalangan kokomoi ponguludan modular

Standard Ponuangan, Standard Pambalajaran om Standard Prestasi

Id suang do Dokumen Standard Kurikulum om Pentaksiran (DSKP) diti poinhanggum o Standard Ponuangan, Standard Pambalajaran om Standard Prestasi.

Jodual 4: Kointalangan kokomoi Standard Ponuangan, Standard Pambalajaran om Standard Prestasi

STANDARD PONUANGAN	STANDARD PAMBALAJALAN	STANDARD PRESTASI
Kointalangan poimbida' kokomoi toilaan, kabaalan om kowoowoyo' di milo dimpoton toi ko' inoboson do tangaanak id kolimpupuson do Toun 6	Kointatapan do kriteria toi ko' indikator kualiti pambalajaran om koinabasan di milo tukuon montok momodimpot isoiso' Standard Ponuangan.	Iso' nuludan kriteria poimbida' di noulud montok popokito taang koinabasan di milo dimpoton toi ko' pokitonon do tangaanak sabaagi panakatanda' do nokoinobos o tangaanak do isoiso' toilaan, kabaalan toi ko' woyo' di nokoia'.

Tema

Ponuangan montok tikid gana' pomogunaan boros id pambalajaran Boros Kadazandusun nopo nga' pinoimpou id tema di kosudong montok tangaanak sikul tosiriba'. Tema nopo ngaawi' diti nga' :

- Winoun Songdii'
- Winoun Susuyan
- Winoun Toilaan

Kawasa' o mongigia' do momili' uhu montok isoiso' tema di pointantu. Uhu nopo di kawasa' do pili'on i kagayat om kohiok do tangaanak nga' uhu di kirati' id koposion tikid tatau om uhu kokomoi timpu baino i asaru' kalabus id media masa om media elektronik. Sabaagi iso' poomitanan, kosudong do pilion o uhu kokomoi liud miagal ko 'Liyud id kinoyonon ku' montok tema Winoun Songdii', soira' kiwaa kinantakan do liud id posorili' kinoyonon. Maya' pogibaabaran diti, kaanu tangaanak mogi'i'ilang do koilaan kokomoi pason pogoduan molohing di tinu' i' om nogi' susuyan om kotumbayan sandad tinaru' Kadazan om Dusun kokomoi isoiso' kinantakan liud. Kopongia'an do uhu diti nogi' kaanu popisoungko sawi-awi' kabaalan boros.

KURIKULUM BOROS KADAZANDUSUN

Panatalan nopo do pongia'an om pambalajalan Boros Kadazandusun nga' popotilombus tungkus koubasanan om toilaan sandad tinaru Kadazan om Dusun maya' ponginabasan kabaalan mokinongou om moboros, mambasa' om monuat. Ponginabasan momoguno Puralan Boros om monginonong Kolumison Boros nga' onuan nogi' do kapanatalan id pongia'an om pambalajalan do mato palajalan diti. Suai ko' mantad dii, koilaan kokomoi tungkus koubasanan tinaru Kadazan om Dusun nga' poia'on nogi' kumaa tangaanak.

Kabaalan Mokinongou om Moboros

Mokinongou om moboros nopo nga' iso' kabaalan di touhai montok literasi. Li nodii poogi' do unsubon o tangaanak do minsingilo om momoguno do woyo' mokinongou di kotunud. Unsubon o tagaanak do tumimpun do minsingilo do moboros mantad taang popolombus do tuni pimato di kotunud om kumaa nogi' do popolombus do boros, frasa om gisom no do kaanu popolombus do ayat di pointunud, oulud om olinuud montok mogikaakawo kohuboyoon.

Aktiviti nopo di kosudong do papanahon montok do kabaalan diti nga' aktiviti minsingumbal, manahak tisuli', mangarati' om momoguno do

koilaan di norongou. Toinsanan aktiviti diti kawasa' do huliton mooi do kogiroto o pomogunaan do pancaindera do tangaanak om pointounda' tomoimo do miromut.

Id kolimpupuson do sikul tosiriba', kaanu o tangaanak momoguno pomoroitan om loyuk di kotunud id pomoroitan do mogikaakawo boros om kaanu manahang, manahak tisuli' om popolombus kawagu koilaan di norongou toi ko' di nokito. Suai ko' mantad ngaawi' dilo' kaanu nogi' o tangaanak do mikomunikasi momoguno boros di kotunud, ayat di agramatis om kobooboroso' di olinuud.

Poinhanggum nopo id Standard Pambalajalan do Toun 6 diti nga' kabaalan monoining om popolombus tuni mogikaakawo vokal, monoinu' pomoroitan om mamarait mogikaakawo boros om popolombus mogikaakawo ayat id piumpangalan. Pointutunon nogi' o kabaalan monginomot om poposunud kawagu do koilaan di naanu mantad kopoilaan, rencana, tangon, abal om ponuhuan.

Kabaalan Mambasa'

Id kabaalan mambasa' oponsol do kaanu o tangaanak popolombus tuni pimato montok pomoroitan Boros Kadazandusun. Koilaan diti koponguhup id kabaalan popolombus boros, frasa om ayat di mogikaakawo loyuk om kopolombusan.

Montok iso' pongia'an kabaalan mambasa' di kohiok, unsubstong o mongingia' do momoguno teks mantad sinding, hiis, tangon toi ko' bukakak, tu' kounsub iti do tangaanak mambasa' om kagayat nogi' do ginawo. Montok kabaalan mongija', potimpunon do popo'ia' mantad mongintutun tuni pimato kumaa tuni do fonim, putul boros gisom no owonsoi iso' boros di kotunud.

Id kolimpupuson do sikul tosiriba', kaanu o tangaanak popolombus boros, frasa om ayat tumanud pomoroitan, loyuk om otus di pointunud om olinuud. Kaanu nogi' o tangaanak do mambasa' om popolombus mogikaakawo teks do alantas om tumanud loyuk kopolombusan di kotunud. Suai ko' mantad diti, kaanu nogi' o tangaanak do momoguno mogikaakawo kabaalan mambasa' montok maganu, monguama' om poposunud kawagu do koilaan id teks pambasaan.

Poinhanggum nopo id Standard Pambalajalan Toun 6 diti nga' kabaalan monompipi' pimato, monoinu' ija'an om pamansayan boros. Boros nopo di pointutunon id Toun 4 nga Boros Mintootoiso, Boros Nosugkuan, Boros Misompuru om Boros Misaup.

Kabaalan popolombus mogikaakawo ayat miapai momoguno ohou di otolinahas om loyuk di kotunud nga' posontolon nogi' id toun diti. Poinsuang nogi' o kabaalan mongompuri om manahak tisuli' kumaa koilaan di nabasa' mantad kopoilaan, rencana, tangon, abal, ponuhuan om pibarasan.

Kabaalan Monuat

Timpuunon nopo do popo'ia' id kabaalan monuat nga' kabaalan mongigit pinsil di pointunud. Oponsol do pasangadon kabaalan diti mooi do oubas dii o tangaanak do monuat momoguno ralan di pointunud. Panatalan nopo do kabaalan diti nga' papawakas tuhat tunturu' om longon, popomogot kabaalan motor, popoingkawas kabaalan visual om koordinasi mato om longon mooi do kaanu dii o tangaanak monginobos kabaalan monuat. Suai ko' mantad dilo, hontolon nogi' id kabaalan diti o koilaan monuat pimato miapai momoguno ralan di pointunud mooi do kaanu o tangaanak do monuat boros, frasa om ayat di poimpunong, otolinahas om oulud.

Id kolimpupuson do sikul tosiriba', kaanu o tangaanak monuat miampai momoguno do ralan ponuatan di pointunud, kaanu momonsoi mogikaakawo boros, kaanu monuat mogikaakawo ayat miampai momoguno boros, ayat om tanda' basa' di kotunud, momonsoi karangan om mongopot sorita' i momoguno boros, ayat, format om puralan boros di kotunud om olinuud.

Poinhanggum nopo id Standard Pambalajalan Toun 6 diti nga' kabaalan monuat boros di kimora, kidiftong om kisongui. Suai ko' mantad dilo', po'ia'on nogi' o kabaalan monugku boros om monuat boros momoguno ponuatan mirangkai. Kabaalan monuat mogikaakawo ayat nopo nga' po'ia'on maya' aktiviti mongulud boros, frasa toi ko' ayat om nogi maya' aktiviti momonsoi ayat tumanud bahan pongunsub. Id Toun 6, po'ia'on nogi' o kabaalan mongopot sorita' om monuat momoguno format ponuatan di kotunud montok kopoilaan, rencana, tangon, abal, ponuhuan om pibarasan.

Aspek Kolumison Boros

Maya' modul kolumison boros kaanu o tangaanak do kosiwatan mongintutun, minsingumbal om monginonong do tungkus koubasanan tinaru Kadazan om Dusun. Kaanu nogi' iti do papasarabak kaanangan do tangaanak doid pinsingilaan do boros

Kadazandusun om nogi' popoingkawas imaginasi tangaanak maya' aktiviti di noulud id Standard Pambalajalan. Aspek Kolumison Boros diti manahak kosiwatan kumaa tangaanak do mokinongou boros Kadazandusun mantad mogisuai-suai tadon miagal ko' mantad sinding, hiis koubasanan om susuyan di kosudong.

Id kolimpupuson do sikul tosiriba', kaanu tangaanak mongintutun, monginonog om popolombus do tungkus koubasanan om toilaan sandad do tinaru Kadazan om Dusun maya' mogikaakawo aktiviti di kohiok.

Poinhanggum nopo id Standard Pambalajalan Toun 6 diti nga' kokomoi do mongintutun om monginonong do kotumbayaan sandad om tungkus koubasanan do tinaru Kadazan om Dusun miagal ko' do bobolian om pogoduhan id koposion tikid tatau, tinunturu' om tangon tinaru. Suai ko' mantad diti, onuan nogi' o tangaanak do kosiwatan do monginonog om popolombus do boros tinungkusan miagal ko tangon, sundait om hiis. Poinsuang nogi' id Standard Pambalajan Toun 6 o pongintutunan kokomoi do toilaan sandad om tungkus koubasanan do tinaru Kadazan om Dusun maya' aktiviti monurubung paganakan sondji' om ponoriukan mantad internet.

Aspek Puralan Boros

Aspek Puralan Boros id Kurikulum Boros Kadazandusun nopo nga' kokomoi do kogisaman do tangaanak momoguno Sistem Boros Kadazandusun di kotunud id mogisuusuai kohuboyoon.

Id kolimpupuson do sikul tosiriba', kaanu o tangaanak toilaan momoguno pimato montok mongija' boros, toilaan kokomoi pomogunaan do Sompuruan Boros, Pomoroitan Ginumu' om Tukadan. Suai ko' mantad dilo koilo nogi' o tangaanak kokomoi do ralan momonsoi mogikaakawo ayat di agramatis om olinuud id lisan om nogi' id ponuatan.

Poinhanggum nopo id Standard Ponuangan Toun 6 diti nga' kabaalan popotunud ija'an, mamarait boros om mongija' boros nosugkuan. Suai ko' mantad diti, poihsuang nogi' o kabaalan momoguno Sompuruan Boros, momonsoi mogikaakawo boros om mongintutun miampai momoguno do nuludan ayat MSOM, MSAk om MSAkO. Koilaan Puralan Boros suai i inoboson id Toun 6 nopo minsingumbal momoguno do tanga' basa', pomoroitan ginumu' om tukadan id ayat.

Sistem Boros

Abaagi o sistom boros Kadazandusun doid piipiro komponen: Fonetik, Fonologi, Sistom Ija'an Morfologi, Sintaksis om Semantik. Oponsol do po'ia'on koilaan momoguno Sistem Boros kumaa tangaanak di minsingilo do boros Kadazandusun mooi do kaanu nodii o tangaanak do momoguno boros Kadazandusun di kotunud om oulud.

i) Fonetik om Fonologi

Oponsol do posunudon kumaa tangaanak o koilaan mamarait om popolombus boros miampai momoguno loyuk om kopolombusan di pointunud mooi do koilo o tangaanak do mamarait boros om popolombus ayat di pointunud. Oponsol o koilaan diti id Boros Kadazandusun mooi do kaanu dii o tangaanak do popolombus komoyon di kotunud kumaa tulun suai. Suai ko' mantad dii, oponsol nogi' o koilaan diti mooi do kaanu o tangaanak do mangarati' boros om komoyon do tulun suai id pilumaagan tikid tatau.

ii) Sistom Ija'an om Ponuatan

Oponsol kopio do posunudon kumaa do tangaanak o Sistom Ija'an Boros Kadazandusun mooi do kaanu o tangaanak do momonsoi ponuatan di pointunud om oulud. Id Sistom Ija'an minog do inoboson do tangaanak o piipiro aspek mooi do kaanu nodii yolo' do momonsoi ponuatan di poimpunong. Pointayad id siriba' diti, toinsanan aspek di oponsol do oilaan:

- a) pimato Boros Kadazandusun
- b) He' / ' /
- c) / b / om / d / om / b / om / d /
- d) mora om diftong
- e) konsonan on vokal noolos

iii) Morfologi

Morfologi nopo nga' iso' gana' toilaan di monoriuk pamansayan boros. Abaagi o aspek Morfologi Kadazandusun id duo komponen: Sompuruan Boros om Pamansayan Boros miagal di pointayad id Jo^{du}al 5.

Jo^{du}al 5: Aspek di okito id Morfologi

MORFOLOGI	
Sompuruan Boros	Pamansayan Boros
<ol style="list-style-type: none"> 1. Boros Ngaran 2. Boros Maan 3. Boros Ula 4. Boros Toguangon 	<ol style="list-style-type: none"> 1. Struktur Boros <ol style="list-style-type: none"> i) Boros Sandad ii) Boros Noolos 2. Bontuk Boros <ol style="list-style-type: none"> i) Boros Mintootoiso ii) Boros Nosugku iii) Boros Misompuru iv) Boros Misaup v) Pananda Wacana vi) Partikol vii) Tanda' Basa'

iv) Sintaksis

Sintaksis nopo nga' iso' ponoriukan kokomoi pamansayan ayat. Abaagi id duo komponen o aspek sintaksis diti miagal di okito id Jodual 6.

Jodual 6: Aspek di okito id Sintaksis

SINTAKSIS	
Ponguludan Boros	Sistom Panandaan
1. Guas Ayat	1. Pananda Fokus
2. Bontuk Ayat	2. Partikol
3. Kawo Ayat	3. Pananda Timpu
4. Nuludan Ayat	

v) Kopomoroitan ginumu'

Kopomoroitan ginumu' nopo nga' popiumbangan do Boros Ngaran Koizaai i popokito do ginumu'. Kiwaa 2 kowowoyoo' do kopomoroitan ginumu':

- a) Kopomoroitan Ginumu' Ointob
- b) Kopomoroitan Ginumu' Au' Ointob

vi) Tukadan

Poinhanggum no id tukadan o boros mikagos, poidadan om poniriban i oponsol do po'ia'on kumaa tangaanak mooi do kaanu nodii yolo' mongintutun om momoguno do tukadan id lisan toi ko' ponuatan montok popokito iso' ponginabasan do boros di takawas.

vii) Tinimungan Boros

Tinayadan tinimungan boros montok sikul tosiriba' potonggoyon miampai do dokumon standard diti. Tinayadan tinimungan boros diti kisuang do boros di asaru' do oguno id pibarasan toi ko' id ponuatan om oponsol do inoboson do tangaanak ngaawi'. Sundung po do ingkaa, oponsol nogi' do poia'on do mongigia' o boros suai i au' nakatayad id tinayadan diti miampai tumanud tema toi ko' uhu di nokosuul id Standard Ponuangan.

Nota: Montok popomogot do toilaan kokomoi Sistem Boros Kadazandusun kawasa' do momorujuk do buuk Puralan Boros Kadazandusun id Sikul i pinalabus do Bahagian Pembangunan Kurikulum, Kementerian Pendidikan Malaysia

1.0 KABAALAN MOKINONGOU OM MOBOROS

STANDARD PONUANGAN	STANDARD PAMB <u>A</u> LAJALAN	NUUT
1.1 Mongintutun tuni boros mantad teks di norongou.	Kaanu o tangaanak: 1.1.1 Mokinongou tuni pimato noolos id isoiso' boros. 1.1.2 Mongintutun pomoroitan pimato montok boros noolos.	Pimato noolos: <i>lcl, lel, flf, lql, lxl</i> <u>B</u> ank Supermarket

STANDARD PONUANGAN	STANDARD PAMBALAJALAN	NUUT
<p>1.2 Mamarait boros momoguno pomoroitan om loyuk di kotunud.</p>	<p>1.2.1 Moningduhai pomoroitan boros mantad bahan pongunsub.</p> <p>1.2.2 Mamarait mogikaakawo boros miampai momoguno kopomoroitan, otus om loyuk di kotunud.</p> <p>1.2.3 Mongintutun boros ponuduk do kakadayan id teks audio.</p> <p>1.2.4 Mongintutun boros ponuduk do pogun id teks audio.</p>	<p>Poomitanan:</p> <ul style="list-style-type: none"> • Id suang • Id siriba' • Id sawat

STANDARD PONUANGAN	STANDARD PAMBALAJALAN	NUUT
<p>1.3 Mokinongou montok manahang om manahak tisuli' kumaa koilaan di norongou mantad mogikaakawo teks.</p>	<p>1.3.1 Mokinongou montok mogihum koilaan gama om waya' id teks <u>audio</u>.</p> <p>1.3.2 Mokinongou montok mongintutun <u>idea</u> toponsol om <u>idea</u> ponokodung id teks <u>audio</u>.</p> <p>1.3.3 Mokinongou montok monim<u>bagos</u> teks.</p> <p>1.3.4 Mokinongou montok mangarati' topurimanan.</p>	<p>Aktiviti:</p> <ul style="list-style-type: none"> • Mokinongou teks mantad <u>audio</u> montok momonsoi tinunturu'. • Mokinongou tangon om manahak do sogu' montok do koowian do tangon dii. • Momogonop ayat. • Momongo peta pomusarahan momoguno koilaan i naanu mantad teks <u>audio</u>. • Mokinogou teks mantad <u>audio</u> om popoboros woyo' toluud di norongou toi ko naanu mantad teks. <p>Kawo teks:</p> <ul style="list-style-type: none"> • Kopoilaan • Rencana • Tangon • <u>Abal</u> om • Ponuhuan

STANDARD PONUANGAN	STANDARD PAMBALAJALAN	NUUT
1.4 Popolomb <u>u</u> s kawagu koilaan di norongou toi ko' nokito.	1.4.1 Poposogu' <u>i</u> dea suai mantad teks toi ko' koilaan di norongou. 1.4.2 Papadalin koilaan di norongou id teks linear. 1.4.3 Manahak taksiran kumaa <u>b</u> ahan pongunsub di pinokito. 1.4.4 Manahak sogu' kumaa <u>b</u> ahan pongunsub di pinokito	Kawo <u>B</u>ahan Pongunsub: <ul style="list-style-type: none"> • Gamb<u>a</u>l • Grafik • Surat A<u>b</u>al • S<u>i</u>nding • Hiis • Pibarasan Aktiviti: <ul style="list-style-type: none"> • Monimung koilaan miampai momoguno do peta pomusarahan. • Monuduk ralan momonsoi tinunturu'. • Popoilo mesej mantad nunu i norogou toi ko' nokito mantad <u>b</u>ahan pongunsub. • Minsingkono tumanud ahal id <u>b</u>ahan pongunsub.

STANDARD PONUANGAN	STANDARD PAMBALAJALAN	NUUT
<p>1.5 Mikomunikasi momoguno boros di kotunud, ayat di agramatis om kobooboroso' di olinuud.</p>	<p>1.5.1 Manahak pomusarahan miampai kotumbayaan song^uii' tumanud uhu di pinatahak.</p> <p>1.5.2 Popolombus pibarasan montok mogikaakawo kohuboyoon.</p> <p>1.5.3 Mogibooboros kokomoi isoiso' uhu kanaanangan id kinaantakan formal.</p>	<p>Kawo Ayat:</p> <ul style="list-style-type: none"> • Toomod • Pongudio • Ponuhuan • Kotigagan <p>Piumpangan:</p> <ul style="list-style-type: none"> • monguhot abal • magalap • monorimo pagalapan • au' monorimo pagalapan <p>Kawo Teks:</p> <ul style="list-style-type: none"> • Kopoilaan • Tangon • Abal • Ponuhuan

TAANG KOINABASAN KABAALAN MOKINONGU OM MOBOROS

STANDARD PRESTASI	
TAANG KOINABASAN	KOINTALANGAN
1 Au' Kodonto	Kaanu manahak tisuli' di au' kodonto kumaa mogikaakawo ponguhatan, ponuhuan om popolombus koilaan miampai momoguno boros Kadazandusun di au' poingonop id komunikasi lisan.
2 Songgisom	Kaanu manahak tisuli' di kosudong kumaa mogikaakawo ponguhatan, ponuhuan om popolombus koilaan miampai momoguno boros Kadazandusun di songgisom id komunikasi lisan.
3 Giigina'	Kaanu manahak tisuli' di kotunud kumaa mogikaakawo ponguhatan, ponuhuan om popolombus koilaan miampai momoguno boros Kadazandusun di kotunud om olinuud id komunikasi lisan.
4 Awasi'	Kaanu manahak tisuli' di tawasi' kumaa mogikaakawo ponguhatan, ponuhuan om popolombus koilaan miampai momoguno layuk om boros Kadazandusun di oulud om olinuud id komunikasi lisan. Kaanu popokito kabaalan mongompuri soira' maganu om poposunud kawagu do koilaan.
5 Akawas	Kaanu manahak tisuli' di topinto kumaa mogikaakawo ponguhatan, ponuhuan om popolombus koilaan miampai momoguno layuk om boros Kadazandusun di kotunud, oulud om olinuud id komunikasi lisan. Kaanu popokito kabaalan mongompuri om manahang soira' maganu om poposunud kawagu do koilaan.
6 Nokoinuntu	Kaanu manahak tisuli' di topinto kumaa mogikaakawo ponguhatan, ponuhuan om popolombus koilaan miampai momoguno layuk om boros kadazandusun di kotunud, oulud om olinuud id komunikasi lisan. Kaanu popokito woyo' pomusarahan di okreatif, okritis om akawas soira' maganu om poposunud do koilaan om milo omitanan.

2.0 KABAALAN MAMBASA'

STANDARD PONUANGAN	STANDARD PAMBALAJALAN	NUUT
2.1 Monoinu' tuni pamansayan boros.	Kaanu o tangaanak: 2.1.1 Monginomot pamansayan montok mogikaakawo boros noolos. 2.1.2 Monoinu' ija'an om kopolombusan do boros.	Aktiviti: Suhuon on tangaanak mokinongou do mongingia' mamarait do boros di okito id buuk toi ko' bahan pongunsub.
2.2 Popolombus boros momoguno pomoroitan di kotunud.	2.2.1 Mambasa' om monompipi' boros ponuduk do kakadayan id teks pambasaan. 2.2.2 Mambasa' om monompipi' boros ponuduk do pogun id teks pambasaan. 2.2.3 Monindu' komoyon boros tumanud bahan pogunsub.	Aktiviti: Popolombus boros, ayat om teks pambasaan tumanud poomitanan mongingia' toi ko' mantad audio. Mambasa' opuhod.

STANDARD PONUANGAN	STANDARD PAMBALAJALAN	NUUT
2.3 Manganu om monguama' koilaan di nabasa'.	2.3.1 Mambasa' om mamarati gama' om waya' id teks linear om okon linear. 2.3.2 Mambasa' om mamarati' koilaan poinlisok id isoiso' teks. 2.3.3 Mambasa' montok mogihum koilaan toponsol id teks pambasaan. 2.3.4 Mongulud koilaan di nabasa'. 2.3.5 Monimbagos teks pambasaan.	<ul style="list-style-type: none"> • Koilaan toponsol • Koilaan poinlisok Aktiviti: <ul style="list-style-type: none"> • manahak tisuli' lisan toi ko' ponuatan • papatayad do koilaan di nabasa'
2.4 Poposunud kawagu koilaan di nabasa'.	2.4.1 Poposunud gama' om waya' mantad teks. 2.4.2 Poposunud koilaan poinlisok mantad teks toi ko' bahan pongunsub. 2.4.3 Poposunud koilaan toponsol mantad teks toi ko' bahan pongunsub. 2.4.4 Poposunud ponolibamban isoiso' isu id teks pambasaan.	Aktiviti: <ul style="list-style-type: none"> • momoguno do jodual, peta pomusarahan, carta • momonsoi do ilustrasi montok popoilo kawagu' koilaan di nabasa' • popoboros do koilaan di nabasa' • papatayad do koilaan di nabasa'

TAANG KOINABASAN KABAALAN MAMBASA'

STANDARD PRESTASI	
TAANG KOINABASAN	KOINTALANGAN
1 Au' Kodonto	Au' alantas do mambasa'. Kaanu manahak tisuli' di au' kodonto kumaa koilaan di nabasa' om popolombus kawagu koilaan di nabasa' miampai momoguno boros Kadazandusun di au' poingonop.
2 Songgisom	Alantas do mambasa' nga' au' otolinahas o pomoroitan. Kaanu manahak tisuli' di kosudong kumaa koilaan di nabasa' om popolombus kawagu koilaan di nabasa' miampai momoguno boros Kadazandusun di songgisom.
3 Giigina'	Alantas om otolinahas do mambasa'. Kaanu manahak tisuli' di kotunud kumaa mogikaakawo kumaa koilaan di nabasa' om popolombus kawagu koilaan di nabasa' miampai momoguno boros Kadazandusun di kotunud om olinuud.
4 Awasi'	Alantas om otolinahas do mambasa' miampai kaanu momoguno layuk di kotunud. Kaanu manahak tisuli' di tawasi' kumaa mogikaakawo koilaan di nabasa' om popolombus kawagu koilaan di nabasa' miampai momoguno boros Kadazandusun di oulud om olinuud. Kaanu popokito kabaalan mongompuri soira' maganu om poposunud kawagu do koilaan.
5 Akawas	Alantas om otolinahas do mambasa' miampai kaanu momoguno layuk di kotunud. Kaanu manahak tisuli' di topinto kumaa mogikaakawo koilaan di nabasa' om popolombus kawagu koilaan di nabasa' miampai momoguno boros Kadazandusun di kotunud, oulud om olinuud. Kaanu popokito kabaalan mongompuri om manahang soira' maganu koilaan.
6 Nokoinuntu	Alantas om otolinahas do mambasa' miampai kaanu momoguno layuk di kotunud. Kaanu manahak tisuli' di topinto kumaa mogikaakawo koilaan di nabasa' om popolombus kawagu koilaan di nabasa' miampai momoguno boros Kadazandusun di kotunud, oulud om olinuud. Kaanu popokito woyo' pomusarahan di okreatif, okritis om akawas soira' maganu om poposunud do koilaan om milo omitanan.

3.0 KABAALAN MONUAT

STANDARD PONUANGAN	STANDARD PAMBALAJALAN	NUUT
3.1 Momonsoi boros.	Kaanu o tangaanak: 3.1.1 Monuat mogikaakawo boros noolos. 3.1.2 Monuat boros kipimato noolos. 3.1.3 Monuat boros tumanud bahan pongunsub di pinatahak.	Aktiviti: <ul style="list-style-type: none"> • monuat boros toi ko' frasa tumanud bahan pongunsub di pinatahak
3.2 Momonsoi ayat di kotunud om olinuud id ponuatan.	3.2.1 Momonsoi mogikaakawo ayat kinuludan MSAkO. 3.2.2 Momonsoi mogikaakawo ayat montok popolombus pamagatangan. 3.2.3 Momonsoi mogikaakawo ayat montok popolombus do lisi do wokon. 3.2.4 Momonsoi mogikaakawo ayat montok manahak pongunsuban.	Aktiviti: <ul style="list-style-type: none"> • Mongulud boros • Popisudong frasa • Mongoput ayat • Momogonop ayat • Momili' boros/frasa

STANDARD PONUANGAN	STANDARD PAMBALAJALAN	NUUT
<p>3.3 Momonsoi mogikaakawo genre ponuatan miampai momoguno boros om Puralan Boros di kotunud om olinuud.</p>	<p>Kaanu o tangaanak:</p> <p>3.3.1 Monuat teks linear om okon linear.</p> <p>3.3.2 Monuat susuyan.</p> <p>3.3.3 Monuat surat formal.</p> <p>3.3.4 Monuat panahangan.</p> <p>3.3.5 Monuat mogikaakawo ponuhuan.</p>	<p>Aktiviti:</p> <ul style="list-style-type: none"> • Momoguno peta pomusarahan montok papatayad tonsi id isoiso' ponuatan.

TAANG KOINABASAN KABAALAN MONUAT

STANDARD PRESTASI	
TAANG KOINABASAN	KOINTALANGAN
1 Au' Kodonto	Kaanu momonsoi boros, frasa, ayat om ponuatan naratif om okon naratif maya' ponguhupan di potilombus mantad mongingia'. Kaanu monginwasi' om monimban ponuatan di nowonsoi id aspek ija'an om pomogunaan tanda' basa' maya' ponontudukan di potilombus mantad mongingia'.
2 Songgisom	Kaanu momonsoi boros, frasa, ayat, ponuatan naratif om okon naratif maya' ponguhupan di amaamaa' mantad mongingia'. Kaanu mongulud tonsi id ponuatan. Koilaan di polombuson kosudong. Kaanu popokito kaparagatan do momoguno boros Kadazandusun di songisom id ponuatan. Kaanu monginwasi' om monimban ponuatan di nowonsoi id aspek ija'an om pomogunaan tanda' basa' maya' ponontudukan di amaamaa' mantad mongingia'.
3 Giigina'	Kaanu momosoi boros, frasa, ayat, ponuatan naratif om okon naratif maya' ponguhupan di tokuri' mantad mongingia'. Kaanu mongulud tonsi id ponuatan. Koilaan di polombuson awasi'. Kaanu popokito kaparagatan do momoguno boros Kadazandusun di oulud om olinuud id ponuatan. Kaanu monginwasi' om monimban ponuatan di nowonsoi id aspek ija'an om pomogunaan tanda' basa' maya' ponontudukan di tokuri' mantad mongingia'.
4 Awasi'	Kaanu momosoi boros, frasa, ayat om ponuatan naratif om okon naratif momoguno mogikaakawo ayat di kotunud om olinuud. Kaanu mongulud om monguyad tonsi id pangaan. Kaanu popolombus do koilaan di kotunud. Kaanu popokito kaparagatan do momoguno boros Kadazandusun di oulud om olinuud id ponuatan. Kaanu monginwasi' om monimban ponuatan di nowonsoi id aspek ija'an om pomogunaan tanda' basa'.

5 Akawas	Kaanu momonsoi boros, frasa, ayat, ponuatan naratif om okon naratif momoguno mogikaakawo ayat di kotunud oulud om olinuud. Kaanu mongulud om monguyad tonsi miapai pounayan di ologik. Kaanu popolombus do koilaan di tawasi'. Kaanu popokito kaparagatan do momoguno boros Kadazandusun di kotunud, oulud om olinuud id ponuatan. Kaanu monginwasi' om monimban ponuatan di nowonsoi id aspek ija'an om pomogunaan tanda' basa'.
6 Nokoinuntu	Kaanu momonsoi boros, frasa, ayat om ponuatan naratif om okon naratif momoguno mogikaakawo ayat di kotunud oulud om olinuud. Kaanu mongulud om monguyad tonsi miapai pounayan di ologik. Kaanu popolombus do koilaan di tawasi'. Kaanu popolombus do koilaan di opinto miapai momoguno boros Kadazandusun di kotunud, oulud, olinuud om popokito woyo' pomusarahan di kreatif, kritis om akawas id ponuatan. Kaanu monginwasi' om monimban ponuatan di nowonsoi id aspek ija'an om pomogunaan tanda' basa'.

4.0 ASPEK KOLUMISON BOROS

STANDARD PONUANGAN	STANDARD PAMB <u>A</u> L <u>A</u> JALAN	NUUT
4.1 Monginonong om momogompi Kointutunan tinaru Kadazan om Dusun.	Kaanu o tangaanak: 4.1.1 Mokinongou om popolomb <u>u</u> s mogikaakawo sinding. 4.1.2 Mongintutun kotumb <u>a</u> yaaan sandad do tinaru. 4.1.3 Mongintutun koubasanan sandad tinaru.	Aktiviti: <ul style="list-style-type: none"> • S<u>i</u>nding kaamatan • S<u>i</u>nding patriotik • Mamb<u>a</u>sa' rencana toi ko' mogihum koilaan mantad internet. • Maganu koilaan mantad <u>b</u>uuk, internet toi ko' mantad kointalangan do mongingia' toi ko' molohing sond<u>i</u>i'.

STANDARD PONUANGAN	STANDARD PAMBALAJALAN	NUUT
4.2 Popolombus do boros tinungkusan tinaru.	Kaanu o tangaanak: 4.2.1 Mokinongou mogikaakawo hiis 4.2.2 Popolombus mogikaakawo hiis 4.2.3 Mongintutun kawo hiis. 4.2.4 Mokinongou om monginonong sorita' tinaru 4.2.5 Popolombus mogikaakawo sorita' tinaru 4.2.6 Popoboros ponontudukan id sorita' tinaru'.	Aktiviti: <ul style="list-style-type: none"> • Manangon • Monundait • Popolombus hiis <ul style="list-style-type: none"> • Mongintutun format ponuatan Hiis

STANDARD PONUANGAN	STANDARD PAMBALAJALAN	NUUT
<p>4.3 Popotilombus do toilaan sandad tinaru Kadazan om Dusun.</p>	<p>Kaanu o tangaanak:</p> <p>4.3.1 Papapanau ponurubungan montok mongintutun toilaan sandad tinaru kokomoi pogumoligan posorili'.</p> <p>4.3.2 Mogibooboros montok popionit koilaan di notimung mantad ponurubungan.</p>	<p>Aktiviti:</p> <ul style="list-style-type: none"> • Mongintutun ngaran • Mongilo tadon om guno • Kointalangan toniba' kokomoi do motif om teknik pomutanaman tinaru sandad • Papabanta nunu i nosoriuk • Monuat rencana toi ko' momonsoi buuk tonini
<p>4.4 Manahang om momorun tungkus koinusan tinaru Kadazan om Dusun.</p>	<p>Kaanu o tangaanak:</p> <p>4.4.1 Monoriuk koilaan kokomoi padsakayan sandad.</p> <p>4.4.2 Momolabel padsakayan sandad.</p> <p>4.4.3 Momonsoi replika padsakayan sandad.</p>	<p>Aktiviti:</p> <ul style="list-style-type: none"> • Mongintutun ngaran om guno • Mongilo ralan momonsoi do tinunturu' om bakaang pomutanaman • Popokito demonstrasi momoguno toi ko' momonsoi do do tinunturu' toi ko' bakaang pomutanaman • Mamain sipoot koubasanan toi ko' popointutun sipoot koubasanan • Momonsoi replika

5.0 ASPEK PURALAN BOROS

STANDARD PONUANGAN	STANDARD PAMBALAJALAN	NUUT
5.1 Momuhondom koroitan om ija'an Boros Kadazandusun.	Kaanu o tangaanak: 5.1.1 Momoguno pimato di kotunud id ponuatan. 5.1.2 Momoguno boros di kipimato / ' / id lisan om ponuatan. 5.1.3 Momoguno boros di kikonsonan /b/ om /d/ id lisan om ponuatan.	Aktiviti: <ul style="list-style-type: none"> • Popotunud ija'an • Poposuat nunu i pinoboros • Momili' ija'an di kotunud • Popisudong ija'an

STANDARD PONUANGAN	STANDARD PAMBALAJALAN	NUUT
<p>5.2 Momoguno mogikaakawo Sompuruan Boros id pibarasan om ponuatan.</p>	<p>Kaanu o tangaanak:</p> <p>5.2.1 Momoguno do Boros Ngaran id ayat.</p> <p>5.2.2 Momoguno do Boros Maan id ayat.</p> <p>5.2.3 Momoguno do Boros Ula id ayat.</p>	<p>Aktiviti:</p> <ul style="list-style-type: none"> • Momogonop ayat • Momili' boros • Momili' sisimbar • Monuat ayat tumanud bahan pongunsub
<p>5.3 Momonsoi mogikaakawo boros di kotunud montok gunoon id pibarasan om ponuatan.</p>	<p>Kaanu o tangaanak:</p> <p>5.3.1 Mongintutun om momoguno boros ponokodung id ayat.</p> <p>5.3.2 Mongintutun om momoguno boros popoimagon id ayat.</p> <p>5.3.3 Mongintutun om momoguno boros popiromut ngaran id ayat.</p>	<p>Aktiviti:</p> <ul style="list-style-type: none"> • Momogonop ayat • Momili' boros • Momili' sisimbar • Monuat ayat tumanud bahan pongunsub • Popisudong ayat om gambal

STANDARD PONUANGAN	STANDARD PAMBALAJALAN	NUUT
5.4 Momonsoi mogikaakawo ayat di kotunud om olinuud id pibarasan om ponuatan.	5.4.1 Mongintutun ayat di kinuludan AkSAK id pibarasan on ponuatan. 5.4.2 Momonsoi ayat di kinuludan ArSM id pibarasan on ponuatan. 5.4.3 Momonsoi ayat misompuru. 5.4.4 Momoguno tanda' basa' id ayat.	Aktiviti: <ul style="list-style-type: none"> • Momogonop ayat • Momili' boros • Momili' sisim<u>bar</u> • Monuat ayat tumanud <u>b</u>ahan pongunsub • Popisudong ayat om gamb<u>al</u> • Popisudong frasa • Monginsonong ayat

STANDARD PONUANGAN	STANDARD PAMB <u>A</u> LAJALAN	NUUT
5.5 Momoguno pomoroitan ginumu' id pibarasan om ponuatan.	5.5.1 Momogonop frasa miampai momoguno pomoroitan ginumu' di kotunud. 5.5.2 Momoguno pomoroitan ginumu' id ayat.	Aktiviti: <ul style="list-style-type: none"> • Mongilo pomoroitan ginumu' • Popisudong gamb<u>a</u>l om pomoroitan ginumu' • Momili' pomoroitan ginumu' di kotunud
5.6 Momoguno tukadan id pibarasan om ponuatan.	5.6.1 Momoguno tukadan di kotunud id ayat. 5.6.2 Popo <u>i</u> ngalan pibarasan montok popointalang rati' tukadan.	Aktiviti: <ul style="list-style-type: none"> • Mongilo rati' tukadan • Momonsoi ayat • Popisudong tukadan om gamb<u>a</u>l • Momonsoi <u>b</u>uuk tonini' • Momonsoi <u>b</u>uuk tagayo

NULUDAN BOROS

PONU^{DUK} POGUN		POMOINAN DALABUS		KAKADAYAN	
1.	Gibang	1.	<u>B</u> uul Raga	1.	<u>B</u> aas
2.	Id labus	2.	<u>B</u> uul Siud	2.	<u>B</u> ank
3.	Id sawat	3.	<u>B</u> uul Tapap	3.	Buluguan
4.	Id siriba'	4.	Kingking	4.	Kounter tikit
5.	Id suang	5.	Main Watu	5.	Kuritapui
6.	Mitimbaba'	6.	Mamana'	6.	Lampung T <u>an</u> da'
7.	Osodu'	7.	Migusa'	7.	Ralan Siriba' Tana'
8.	Osomok	8.	Mim <u>b</u> uul	8.	Stesen Tumau
9.	Toning	9.	Popotulud Pinggan	9.	Supermarket
10.	Wanan	10.	Tampanau	10.	Upis pos
MAGAVAU		ADAT PISASAWAAN		ADAT MINIDU POGUN	
1.	Magaagavau	1.	Monohuku'	1.	Minidu' pogun
2.	Mag <u>a</u> ndai	2.	Momuhaboi	2.	Dunsai
3.	Mang <u>a</u> mbai	3.	Matod	3.	Momohosok
4.	Mizungu'	4.	Momokis	4.	Momisok
5.	Modsopi'	5.	Mimpanau do pangasaan	5.	Mogukas
6.	Modsuut	6.	Momuhu do siung	6.	Humontog
7.	Moginakan	7.	Nopung	7.	Mobpuod
8.	Mogititimumg	8.	Sogit	8.	Mogkoudu
9.	Mogkodim	9.	Pinisi'	9.	Tuaha'
10.	Monongkotoluod	10.	Pitas	10.	Manahakoi

TIMPU		KOSUSAAN SANDAD POGUN		POGUMOLIGAN POSORILI'	
1.	Doungadau	1.	Gumuyu' Tana'	1.	Bombon
2.	Doungosuab	2.	Liyud	2.	Mamahui
3.	Doungotuong	3.	Madalit	3.	Manampasi
4.	Minsosodop	4.	Magadau	4.	Mananom
5.	Numawau	5.	Modtongus	5.	Momirot
6.	Pitangadau	6.	Monolon Tandalaga'	6.	Momogompi
7.	Sosodopon	7.	Monolon Talob	7.	Mongumolig
8.	Sumoom	8.	Notutudan	8.	Mononduk
9.	Tanga Sodop	9.	Tanah Nopiang	9.	Patod
10.	Timpu	10.	Tongus Tologod	10.	Tagal

BAKAANG PANANAMAN PARAI

1. Guguyangan
2. Linggaman
3. Radu
4. Ragus
5. Sasarad
6. Surud
7. Tadang
8. Tangkob
9. Tosung
10. Tuunau

PANEL MINOMONSOI

- | | | |
|-----|----------------------|-------------------------------------|
| 1. | Sandra Logijin | Bahagian Pembangunan Kurikulum, KPM |
| 2. | Evelyn Annol | IPG Kampus Kent, Tuaran |
| 3. | Rita Lasimbang | Yayasan Bahasa Kadazandusun |
| 4. | Anderias Henrikus | SRK Sacred Heart, Kota Kinabalu |
| 5. | Benedette Mujah | SK Kionsom, Inanam |
| 6. | Ivy Dosity | SK Darau, Kota Kinabalu |
| 7. | Jemir Kinsom | SK Tampasuk 2, Kota Belud |
| 8. | Mary Binti Kunjam | SK Tombovo, Penampang |
| 9. | Mime Kimbin | SK Tombongon, Tuaran |
| 10. | Patrick Jolius | SK Kibabaig, Penampang |
| 11. | Rachel Misik | SK St. Joseph, Penampang |
| 12. | Zamrul Bin Md. Aslie | SK Tibabar, Ranau |

NOKOGOMPIT MINOMONSOI

- | | | |
|----|---------------------------------|-------------------------------------|
| 1. | Mohamad Shuhaimi Bin Sabaruddin | Bahagian Pembangunan Kurikulum, KPM |
| 2. | Fancey B. Sami | Sk Buit Hill, Penampang |

KOPONONGKOTOHUADANAN**MONONONTUDUK**

Haji Azman bin Haji Adnan	Pengarah
Dr. Latip bin Mohammad	Timbalan Pengarah Kanan (Kluster Dasar Sains & Teknologi)

MONONONTUDUK EDITORIAL

Nooraini binti Kamaruddin	Timbalan Pengarah
Faridah binti Mohamad Zain	Timbalan Pengarah
Dr. Kashry bin Ab. Rani	Timbalan Pengarah
Mohamed Salim bin Taufix Rashidi	Timbalan Pengarah
Hajah Norashikin binti Hashim	Timbalan Pengarah
Fazlinah binti Said	Timbalan Pengarah

KOPONONGKOTOHUADANAN**MONONONTUDUK (April 2019)**

Dr. Mohamed bin Abu Bakar	Pengarah
Datin Dr. Ng Soo Boon	Timbalan Pengarah (Dasar dan Sains & Teknologi)

MONONONTUDUK EDITORIAL (April 2019)

Mohamed Zaki bin Abd. Ghani	Ketua Sektor
Haji Naza Idris bin Saadon	Ketua Sektor
Mahyudin bin Ahmad	Ketua Sektor
Dr. Rusilawati binti Othman	Ketua Sektor
Mohd Faudzan bin Hamzah	Ketua Sektor
Fazlinah binti Said	Ketua Sektor
Mohamed Salim bin Taufix Rashidi	Ketua Sektor
Haji Sofian Azmi bin Tajul Arus	Ketua Sektor
Paizah binti Zakaria	Ketua Sektor
Hajah Norashikin binti Hashim	Ketua Sektor

Penyelaras Teknikal Penerbitan dan Spesifikasi

Isnazhana binti Ismail
Mior Syazril bin Mohamed Sapawi
Siti Zulikha binti Zelkepli

Penyelaras Teknikal Penerbitan dan Spesifikasi (2019)

Saripah Faridah binti Syed Khalid
Nur Fadia binti Mohamed Radzuan
Mohamad Zaiful bin Zainal Abidin
Siti Zulikha binti Zelkepli

ISBN 978-967-420-596-6



9 7 8 9 6 7 4 2 0 5 9 6 6

Bahagian Pembangunan Kurikulum
Kementerian Pendidikan Malaysia
Aras 4, 6-8 Blok E9, Kompleks Kerajaan Parcel E,
62604 Putrajaya.
Tel: 03-8884 2000 Fax: 03-8888 9917
<http://bpk.moe.gov.my>